

忍或入初地捨身速生妙喜世界或生極樂淨佛土中常見如來親承供養

尔時德藏菩薩復白普賢菩薩言若有衆生聞此法門受持讀誦解說書寫得幾所福普賢菩薩言佛子諦聽若有人能攝三界中一切衆生令脫生死得阿羅漢一一羅漢各於百劫以天上妙衣服卧具飲食湯藥種種供養般涅槃後一一復爲起七寶塔恭敬供養若復有人一百劫中淨持禁戒或修忍辱精進禪定是人雖復得無量福不如有人聞此法門尊重信受不生毀謗其福勝彼速成正覺是時十方一切刹土無量諸佛皆自現身讚普賢菩薩言善哉善哉佛子如汝所說時釋迦牟尼如來從其面門放無量色光遍照三有兩種種種華諸妙音樂不鼓自鳴大地微動於光明中而說偈言

若聞此法心清淨

得諸地定陀羅尼

戒忍自在神通力

速證無上佛菩提

磧砂大藏經

大方廣佛華嚴經不思議佛境界分

卅

第二十四册

轉未曾有妙法輪

亦如過去大仙等

於一念中攝多劫

一塵普現無量刹

無量衆生沒三界

諸苦所惱常遍切

邪見纏縛失正道

念念皆今得解脫

普賢菩薩於此法門久已證故爲衆說時億

千天人度一切苦皆於阿耨多羅三藐三菩

提得不退轉德藏菩薩及餘一切菩薩衆會

世間天龍阿脩羅等皆大歡喜信受奉行

大方廣如來不思議境界經

大方廣佛華嚴經不思議佛境界分

唐于闐三藏法師提曇般若譯

如是我聞一時薄伽梵在摩揭陀國於菩提

樹下得阿耨多羅三藐三菩提成等正覺其

菩提樹根深堅固善植於地如栴檀柱樹身

腠長傍無枝葉堅實圓滿名阿澤波也所有

諸鳥不能飛過皮膚細軟文象如綾無量枝

條妙飾間錯其葉表裏素綠莊嚴紫脉顯現

如紺青色枝葉垂下周帀圓滿其華開敷甚

可愛樂光明照耀香氣芬馥其根莖等顯種種色具足衆德如妙高山其下嚴飾如歡喜園光明香氣一踰繕那量夜分遠燭如大火聚其地四面普皆平坦於中有草柔軟滋茂光色鮮潔如孔雀毛有妙香氣令心悅豫無量小樹周帀圍繞其菩提樹王莊嚴勝妙除波利遮德迦及毗陀羅樹無以爲喻佛在樹下大衆圍遶端嚴而住如星中月處淨虛空時有十佛刹極微等諸佛各各從本國土來至於此爲欲莊嚴憐盧遮那爲衆會故示菩薩形其名曰觀自在菩薩摩訶薩曼殊室利菩薩地嚴菩薩虛空藏菩薩金剛藏菩薩無垢稱菩薩善威德菩薩能棄諸善菩薩寶手菩薩大慈菩薩普賢菩薩摩訶薩等而爲上首如是等衆皆來集會復有無量千俱胝諸菩薩衆示聲聞形亦皆來集所謂舍利弗多羅蘇補底沒特伽良演那羅怛羅憍陣那摩訶迦葉波鄔波離阿泥律陀續麗縛多阿難

毗提婆達多跋難陀而爲上首一切皆是久習所行六波羅蜜能近菩提爲欲利益諸衆生故於此雜染佛土示聲聞形復有無量千苾芻尼摩訶鉢刺闍鉢底喬答彌爲上首爲欲調伏下劣有情故雖現女身具丈夫業復有釋梵護世天龍藥叉健達婆阿素羅揭路荼緊捺洛莫呼洛伽人非人等一切非凡皆是菩薩悉來集會何以故以彼諸佛有秘密法威德神通三摩地神變云何菩薩能得了知乃至諸佛威德神通有無邊方一切法空諸力得轉有情云何能得了知如人夢中見種種事若覺悟已即無所見如夢中想如是如是夢愚癡故法體想起諸佛覺悟無有所見以諸甚深無障礙品利益有情微細解脫得成就故而彼菩提樹下薄伽梵端身而住入三摩地名不思議佛之境界此三摩地極勝廣大由此三摩地故諸佛世尊恒常入定說時食時行時乃至般涅槃時如是嚴飾佛

薄伽梵如妙高山王如波利遮德迦樹下安如意珠而彼清淨三十二丈夫相中一切佛刹諸薄伽梵如淨圓鏡普皆示現一一隨好中菩薩本所行皆悉顯現從初光照王因緣乃至究竟定光如來一一苦行事所謂能捨頭目手足身分妻妾男女奴婢僮僕作使國

位宮殿等尔時德藏菩薩摩訶薩諸所修行未成正覺請問普賢菩薩言佛子如來所住三摩地爲是何等三摩地耶佛子云何自然十方佛刹中度脫有情佛事示現佛子此三摩地以何爲名尊者此三摩地云何證得是時普賢菩薩告言善男子諦聽我今爲汝宣說斯事於是諸菩薩起尊重心瞻仰尊顏正念安住同聲說言善哉善哉德藏如汝所問甚爲微妙然彼尊者能知一切尔時大地六種震動所謂動遍動等遍動搖遍搖等遍搖吼遍吼等遍吼擊遍擊等遍擊旋遍旋等遍旋開合上下遍開合上下等遍開合上下東

涌西沒乃至中邊亦復如是當此之時一切衆生所有苦惱暫得休息雨妙天華

尔時普賢菩薩告德藏菩薩言佛子此三摩地是諸佛菩提佛子此三摩地名不思議佛之境界諸佛世尊常住於此從然燈佛得受記已即於是時入三摩地從是以來無功用住於一毛端處有無量佛刹乃至一切佛刹所有極微等諸佛刹土普皆示現或現生於觀史多天從彼沒已下生入胎住胎出胎能行七步而自唱言我應永離生老病死所作已辦或現處宮或現出家修行苦行成等正覺降伏衆魔轉於法輪或現住世壽無量劫度脫衆生所有苦惱乃至示現入般涅槃於一念中普能示現諸佛刹土如上事業於一念中攝一切劫無增無減皆無功用乃至一切有情界未得解脫一一刹那中於一切處作諸佛事是諸佛刹中毛端際處示現無量諸佛刹土如是彼佛無邊威儀然此威儀周

遍虛空無有毛端處而無諸佛刹亦無毛端處而不於中念念示現阿耨多羅三藐三菩提一切諸佛生現正覺乃至般涅槃於極微中亦皆普現一切佛刹極微等諸佛刹土復過是數無量無邊彼彼薄伽梵示現觀史多天宮諸佛行示現度脫無量衆生佛土不小

極微不大何以故以一切法不堅牢如幻如陽焰乃至究竟盡虛空界如是無量佛事業起刹那刹那於有情所常作利益無暫休息譬如即此大菩薩集會十佛刹土極微等數量於摩揭陀國十二踰繕那地分中安住展轉不相障礙如是如是於極微中容受無量阿僧企耶諸佛刹土有餘佛刹各各相向或有相背或有在傍或有相納如是展轉不相障礙如人夢中於一處所見種種事雖見非真實故不能爲礙如是如是此諸佛刹皆惟心量之所變現或有世界見劫火燒或燒已盡或見風起或有清淨或有雜染或現無佛

諸刹土中衆生之類隨其自業各見不同如是如是無量變異譬如餓鬼飢渴所逼於死伽河邊或有見水或有見灰或見膿血或見便利不淨充滿如是如有情於自佛刹土中或見雜染或見清淨或見有佛或見涅槃或見大衆會中說法或有聽聞第一義法或聞廣說檀波羅蜜或見遊行或有見住或有見坐或見食時或見二丈夫量或見七丈夫量或見一踰繕那量或見百踰繕那量或見千踰繕那量或見光明照耀如日初出或見如滿月圓朗空中隨其業行種種見異或見久遠入般涅槃或有不聞諸佛名字譬如餓鬼於河水邊有見猛火或見異事或見如是如此大菩薩集會各各於自佛刹土中佛薄伽梵作菩薩形或見有一佛刹土中劫波火燒或燒已盡或見於此佛刹土中衆生界滿佛現饒益有薄伽梵取諸佛刹入一佛土中令相以示現如患醫者醫因緣故不了衆色

如是如是識因緣故不了眾相於是普賢菩薩告德藏言佛子我今為汝略說此三摩地法一剎那中於一切處乃至盡虛空及眾生界一毛端分量中無量無邊佛刹於一極微中法界極微等諸佛刹土一一佛刹土甚多威儀路如一剎那中為利眾生故有十佛刹

土極微等數量如是念念中於一切處乃至一切眾生未得阿耨多羅三藐三菩提此饒益事常不斷絕如是威儀第二第三第四第五乃至十方所有諸佛無量無邊威德勢力亦復如是今時德藏菩薩聞說是已於此三摩地咸明了通達入不思議諸佛境界覺悟一切諸佛世尊神通威力即於是起以諸威力善巧調伏無量眾生有百苑伽沙諸菩薩眾於三摩地法種種覺悟或有證忍位或有證諸地其中觀自在等菩薩摩訶薩譬如瓶水已滿置於雨中終更不容一滴之水如是如是住第十地諸菩薩眾所行妙行皆已圓

滿多時於此三摩地中示現佛事於一剎那能納無量劫於一極微能納無量土即於一念遍諸佛刹任運度脫無量眾生時薄伽梵住三摩地放眉間白毫相光名能發起其光照曜有功用行諸菩薩眾於十地中亦未覺悟由光觸故能見一切諸佛國土所有住極

微毛端分量處無量佛刹即於是時周遍虛空無量無邊佛刹示現譬如瑠璃瓶滿中盛芥子如是如是於一極微一分量中見諸佛土佛薄伽梵於一如來身一切如來色相顯現一一如來有無量名号於一剎那中一一佛刹土利益一一有情故自然示現此阿耨多羅三藐三菩提如如意珠置高幢上隨諸眾生自然而雨種種珍寶如是如是是一切如來阿羅呵三藐三勃陀無量眾生自然解脫何以故以一切趣不堅牢如幻如陽焰如是此諸佛刹土中有情展轉不相障礙如現神通者山河石壁等終無限礙如是諸菩薩見

彼佛威德自身各各於一切佛刹佛世尊前於一刹那中一一如來所一劫波供養或二劫或三劫或百劫或千劫或一刹那或一牛呼粟多種種種供養於如來所聞說波羅蜜多或聞陀羅尼或聞說諸地見諸如來神通變化以一切劫入一刹那起難遭之想云何如

來有此威德於一念中現無量劫而為我等生善根故廣演如此諸功德聚無量劫所作不思議佛境界三摩地覺悟如是威力如是威德今時德藏菩薩問普賢菩薩言尊者作何功德證此三摩地耶云何修習般若云何布施云何持戒是時普賢菩薩告言佛子於十方處一切清淨圓滿佛刹諸眾生類其中示現無量佛事諸菩薩等積集種種福德善根應供養佛供養法供養僧孝養父母常不斷絕一切貧窮困苦孤獨乞白菩薩皆應悲哀攝受乃至自身血肉隨應施與勿生慳悋何以故以供養佛者其福甚多如是有情受

勝妙樂速當證得阿耨多羅三藐三菩提供養法者生諸善根智慧增長當得覺悟法自在故於一切法能正了知供養僧者種諸善根而彼無量資糧增盛由此菩薩乃至成佛所有孝養父母或尊者耶波陀耶或餘生死中曾得恩惠當思報恩悟今增長何以故以

應如是思惟如先所說於一切處諸佛世尊毛端分量及極微中無有不見諸佛威德諸菩薩等大衆集會我於彼所以清淨心平等憶念而作供養謂一如來法性即是一切如來法性若我供養一如來即一切如來皆已供養於無量劫一一如來所供養亦尔乃至

多劫入一刹那佛神力故深生信解而彼菩薩種植種子得成廣大不思議佛之境界三摩地善男子善女人日日應作如此供養於一切佛薄伽梵前乃至一合掌亦種種種子增長三摩地生滋茂廣大應以尸羅智慧妙願而灌灑之又諸菩薩應如是布施不得揀擇

持戒破戒若愛若憎若貧若富然彼富者雖無所須能施之者自獲利益應當發起殊勝誓願我定當作佛度脫一切衆生於一一刹那一切處毛端分量中一切佛刹我別別當成就乃至一切佛刹極微等一切極微中介所刹土乃至一切佛刹極微於彼彼中轉正

法輪如今世尊鞞盧遮那如來於一刹那中能納一切劫任運即於一一佛土我當示現無量威儀如佛刹極微等一切威儀中如是有情解脫諸苦如苑伽沙乃至盡虛空界及衆生界又諸菩薩應清淨持戒於破戒有情起悲救護不應於彼而生厭捨

時普賢菩薩告德藏言佛子如汝所問云何修習般若汝應諦聽當爲汝說若有樂求無上菩提欲令證得此三摩地應當遠離虛妄諸業惡語染意發起淨心慈悲攝受應往精舍中見其希奇微妙佛像安住不動以金薄表身或純金作諸相具足支節充滿於圓光

中有無量佛妙飾間列結跏趺坐入三摩地即於像前恭敬禮拜應如是思惟我聞十方現在所有諸佛世尊無邊無量謂一切義成如來無量壽如來寶幢如來阿閼鞞如來鞞盧遮那如來寶月如來寶日如來等於彼廣大信樂尊重復應起想是此如來深生尊重

此經分三

四

乃至自然現前得見於一切處當審觀察如是思惟往空閑處心正憶念隨近攝持極一臂量專注憶念無令忘失若有忘失應更往觀如是觀時起尊重心住現佛想不應於彼作形像想如是自然面見諸佛應於彼所以香塗香末香燒香華鬘右遶如是等種種供具而爲供養由一切心如是攝持佛薄伽梵自然現前能見一切能聞一切一切心等能了達故數數決定而取於相復往空閑心念不失若有福德者於三七日中精勤修習速疾現前能見諸佛有於先世所作罪業如是之人不能得見若有希求應起精進勇猛修

行決定觀察何以故由於一境令心調伏勉勵專精菩提資糧無不成辦若多惛沉懈怠放逸自然如是不能解脫何況解脫一切衆生所有苦惱比如大地具爲重擔若如是者於菩提眞道亦不能作精勤修習譬如有人於大海中飲一掬水即爲已飲瞻部洲中所

有河水如是如是若修習菩提海一切三摩地諸忍諸地諸陀羅尼皆已修習是故常應精勤勇猛遠離放逸如是思惟自然現前能見諸佛若已得見即應如是思惟此所見者爲是如來爲形像耶若覺悟此如來現前即於佛所長跪合掌應當憶念如先所說諸佛

威德由大威德及大悲故今於我所現前來也若能發問即應請言惟願世尊爲我演說不思議佛之境界大三摩地法而於其中勿生疑惑設有所說作決定心若得聽聞即於是處圓滿成就或先業障不能申請即應如是種種觀察一切諸法如夢如翳如幻如陽

焰如鏡像如是諸佛猶如虛空平等自性非幻非夢然一切法如幻如夢應當了知由智慧悲佛世尊現今應爲我放大悲光令我苦惱悉皆銷滅復應如是思惟觀察微妙空性亦時世尊從眉間白毫相放大光明光名青焰照觸其頂所有苦惱皆悉消滅即於是處

伏 魔 降 伏

出 世

得法名鞞盧遮那忍種種三摩地皆能覺悟於第七日夜佛薄伽梵夢中現前爲授阿耨多羅三藐三菩提記若如是知此是形像即應思惟一切如來及一切衆生如見形像無實可得如是如是一切如來如幻如化如夢如陽焰自然如是面見如來如夢所見皆非實有如是如是一切如來非生即生非滅即滅異於諸行法性甚深非說能說非去而去非來而來非識所識非我想非命者想非有情想非養育者想非補特伽想非食者想非蘊非不蘊有似蘊相十八界十二處畢竟總無亦非異彼以一切佛一切諸法平等平等

皆同一理如陽焰等一切眾生及諸如來一切佛土皆不離想如是現識緣於色自性如是終無有生如來識滅是故異色觀察應知若一切法不離於想即諸如來毛端分量亦無差別猶如虛空平等平等若我分別佛即現前若無分別都無所見想能作佛離想

無有如是三界一切諸法皆不離心若能了知一切諸佛及一切法惣唯心量得隨順忍或證歡喜地捨身他世速疾生於妙喜世界或生極樂淨佛土中常見如來親承供養於是德藏菩薩摩訶薩白普賢菩薩摩訶薩言佛子若有眾生聞此法門受持讀誦書寫廣

說得幾所福時普賢菩薩告德藏言善男子諦聽此所生福量譬如有人掘取三界一切眾生今解脫生死得阿羅漢果復於彼所起淨意樂無熱惱心經於百劫以衣服飲食卧具湯藥種種供具而為供養彼涅槃已起七寶塔恭敬供養其福甚多若有眾生聞此法

門生信尊重亦不毀謗復經百劫淨修梵行百劫修忍百劫精勤百劫修靜慮所生福聚無有限量若復有人聞此法門生信尊重能正受持速得成佛福過於彼十時十方一切佛土中佛薄伽梵皆現其身讚普賢菩薩言善哉善哉佛子如是如是如汝所說於是釋

迦牟尼如來從其面門放無量色光照曜三界雨眾妙華如是音樂不鼓自鳴出微妙音令心悅豫是時大地微細搖動從光明中演出無量妙伽他曰若聞此法心清淨及忍自在妙神通

獲諸地定陀羅尼
速證無上菩提果

當來能轉於法輪一剎那中納多劫無量眾生溺三界惡見繫縛失正道普賢菩薩說此法門時十俱胝天人所有苦惱皆得解脫於阿耨多羅三藐三菩提得不

還如過去大仙人

於一極微現眾刹

其中放逸受諸苦

念念度脫無空過

普賢菩薩說此法門時十俱胝天人所有苦

惱皆得解脫於阿耨多羅三藐三菩提得不

退轉普賢菩薩摩訶薩於此法門已善通達
現前證得說此經已時德藏菩薩摩訶薩及
諸菩薩天人健達婆阿素羅等一切世間聞
佛所說皆大歡喜信受奉行

大方廣佛華嚴經不思議佛境界分 伏

大乘金剛髻珠菩薩修行分經 伏十

大唐三藏法師菩提流志譯

爾時普思義菩薩摩訶薩白佛言世尊云何
菩薩修行悟入此三摩地佛言善男子如無
悟入是名悟入亦當如我修善提時之所悟
入普思義菩薩白佛言世尊云何如來所修

伏十

一

修

悟入唯願說之佛言善男子往昔有王名曰
金剛髻珠在於寂靜園林之處結跏趺坐正
念思惟如是住時於座右邊忽然出生一大
蓮華其華微妙衆寶合成所謂龍繞堅固栴
檀以爲其莖閻浮檀金以爲其葉摩尼寶珠
以爲其鬚甄叔迦寶以爲其臺爾時衆寶最

勝蓮華臺上忽然化生悉陀太子結跏趺坐
安詳而起下蓮華臺於王右邊膝上而坐爾
時金剛髻珠大王歡喜愛念悉陀太子即將
太子及八萬四千王子俱詣彼佛法界摩尼
山日光明王如來阿羅訶三藐三佛陀所聽
受正法得聞如是法界繒髻與金剛如來心
品三摩地已得五神通云何名爲法界繒髻
與金剛如來心品三摩地耶爾時法界摩尼
山日光明王如來當爲演說即此枳羅句金
剛句法句印句理句相應句密句持句承事
句轉句馳走句速疾句顯示句明呪句說此
品句已繫縛衆魔枳羅繫縛印繫縛句繫等
一切諸句悉入慈句無所諍論是名法界繒
髻與金剛如來心品三摩地是彼法界摩尼
山日光明王如來演說善男子汝知之不昔
稱摩尼寶金銀所成世界者今楞伽摩羅耶
山城是其摩尼寶金銀所成世界是彼法界
摩尼寶山日光明王如來佛刹善男子是金